

গণপ্রজাতন্ত্রী বাংলাদেশ সরকার
অর্থ মন্ত্রণালয়
অভ্যন্তরীণ সম্পদ বিভাগ
(কাস্টমস ও মূল্য সংযোজন কর)

প্রজ্ঞাপন

তারিখ: ১৫ জ্যৈষ্ঠ, ১৪৩১ বঙ্গাব্দ/ ২৯ মে, ২০২৪ খ্রিষ্টাব্দ

এস.আর.ও. নং ১৮১-আইন/২০২৪/৩৩/কাস্টমস।— সরকার, কাস্টমস আইন, ২০২৩ (২০২৩ সনের ৫৭ নং আইন), অতঃপর উক্ত আইন বলিয়া উল্লিখিত, এর ধারা ২৫ এর উপ-ধারা (১) এবং মূল্য সংযোজন কর ও সম্পূরক শুল্ক আইন, ২০১২ (২০১২ সনের ৪৭ নং আইন) এর ধারা ১২৬ এর উপ-ধারা (১) এ প্রদত্ত ক্ষমতাবলে, জাতীয় রাজস্ব বোর্ডের সহিত পরামর্শক্রমে, জনস্বার্থে, সরকারি ও বেসরকারি বিদ্যুৎ উৎপাদনের নিমিত্ত বিদ্যুৎ উৎপাদন কেন্দ্র স্থাপন ও পরিচালনার লক্ষ্যে স্থায়ীভাবে আমদানিকৃত প্লান্ট ও ইকুইপমেন্ট (plant & equipment) এবং অস্থায়ীভাবে আমদানিকৃত ইরেকশন ম্যাটেরিয়ালস (erection materials), যন্ত্রপাতি ও যন্ত্রাংশের উপর আরোপণীয় উক্ত আইনের প্রথম তফসিলে উল্লিখিত কাস্টমস শুল্ক (Customs Duty) যে পরিমাণে ৫% (পাঁচ শতাংশ) এর অতিরিক্ত হয়, সেই পরিমাণ এবং সমুদয় রেগুলেটরি শুল্ক, মূল্য সংযোজন কর বা, ক্ষেত্রমত, সম্পূরক শুল্ক, যদি থাকে, হইতে নিম্নবর্ণিত শর্তসমূহ প্রতিপালন সাপেক্ষে, অব্যাহতি প্রদান করিল, যথা:-

শর্তাবলি

- (১) বিদ্যুৎ উৎপাদন কেন্দ্র কর্তৃক বাণিজ্যিক ভিত্তিতে উৎপাদন শুরুর পূর্বেই স্থায়ীভাবে আমদানিকৃত প্লান্ট ও ইকুইপমেন্ট আমদানি করিতে হইবে এবং বিদ্যুৎ বিভাগ বাণিজ্যিক উৎপাদন শুরু হইবার তারিখ সম্পর্কে জাতীয় রাজস্ব বোর্ডকে অবহিত করিবে;
- (২) বেসরকারি খাতে বিদ্যুৎ উৎপাদনের নিমিত্ত বিদ্যুৎ উৎপাদন কেন্দ্র স্থাপনের লক্ষ্যে সংশ্লিষ্ট বিদ্যুৎ উৎপাদনকারী প্রতিষ্ঠানকে বাংলাদেশ সরকারের সহিত চুক্তিবদ্ধ হইতে হইবে;
- (৩) বিদ্যুৎ উৎপাদন কেন্দ্র কর্তৃক বাণিজ্যিক ভিত্তিতে উৎপাদন শুরু হইবার বারো বৎসর পর্যন্ত অথবা বিদ্যমান চুক্তির মেয়াদ, যাহা কম সেই সময় পর্যন্ত, আমদানিকৃত প্লান্ট ও ইকুইপমেন্টের চালানোর মূল মূল্যের সর্বোচ্চ দশ শতাংশ মূল্যের যন্ত্রাংশ আমদানি করা যাইবে;
- (৪) প্রজ্ঞাপনের শর্ত প্রতিপালনপূর্বক পণ্য চালান আমদানি করা হইয়াছে মর্মে প্রত্যয়নকারী কর্তৃপক্ষের নিকট হইতে **পরিশিষ্ট-১** অনুযায়ী চালানওয়ারী একটি প্রত্যয়নপত্র আমদানিকৃত প্লান্ট ও ইকুইপমেন্ট খালাসের সময় সংশ্লিষ্ট কাস্টমস স্টেশনে দাখিল করিতে হইবে;
- (৫) প্রতিটি চালান খালাসের পূর্বে আমদানিকারক প্রতিষ্ঠান কর্তৃক সংশ্লিষ্ট কমিশনার বরাবর **পরিশিষ্ট-২** অনুযায়ী একটি অঙ্গীকারনামা দাখিল করিতে হইবে;
- (৬) আমদানিকৃত প্লান্ট ও ইকুইপমেন্ট একাধিক কাস্টমস স্টেশনের মাধ্যমে এক বা একাধিক চালানোর মাধ্যমে আমদানিকৃত হইলে আমদানিকারককে

পরিশিষ্ট-৩ অনুযায়ী জাতীয় রাজস্ব বোর্ডের সদস্য (কাস্টমস: নীতি ও আইসিটি) বরাবর আবেদনপত্র দাখিল করিতে হইবে এবং উহার অনুলিপি সংশ্লিষ্ট কমিশনারগণকে প্রদান করিতে হইবে, আবেদনপত্র যাচাইয়ান্তে যথাযথ প্রতীয়মান হইলে উক্ত কোম্পানিকে রেয়াতি সুবিধা প্রদানের জন্য সদস্য (কাস্টমস: নীতি ও আইসিটি) সংশ্লিষ্ট কাস্টম হাউস বা স্টেশন কর্তৃপক্ষকে আদেশ প্রদান করিতে পারিবেন;

- (৭) দফা (৬) এর অধীন কোনো আদেশ প্রদান করা হইলে, সর্বশেষ পণ্য চালান আমদানির ছয় মাসের মধ্যে আমদানিকৃত সমুদয় প্লান্ট ও ইকুইপমেন্ট যথাযথভাবে সংশ্লিষ্ট প্রতিষ্ঠানে স্থাপিত হইয়াছে কিনা সে সম্পর্কে যে কোনো পাবলিক প্রকৌশল বিশ্ববিদ্যালয়ের মেকানিক্যাল বা ইলেকট্রিক্যাল অনুষদের বিশেষজ্ঞ এবং সংশ্লিষ্ট ভ্যাট বিভাগীয় কর্মকর্তা কর্তৃক সরেজমিন পরিদর্শনপূর্বক প্রতিবেদন সংশ্লিষ্ট কাস্টম হাউস বা স্টেশনে দাখিল করিতে হইবে;
- (৮) দফা (৭) এ উল্লিখিত ছয় মাসের মধ্যে উক্তরূপ পরিদর্শন প্রতিবেদন দাখিল করা না হইলে যুক্তিসঙ্গত কারণ উল্লেখপূর্বক উক্ত সময়সীমা শেষ হইবার ত্রিশ দিন পূর্বে সময় বৃদ্ধির জন্য সদস্য (কাস্টমস: নীতি ও আইসিটি) বরাবর আবেদনপত্র দাখিল করা যাইবে, আবেদনপত্র পরীক্ষা-নিরীক্ষা করিয়া যথাযথ প্রতীয়মান হইলে সদস্য (কাস্টমস: নীতি ও আইসিটি) প্রয়োজনে সময় বৃদ্ধির আদেশ প্রদান করিতে পারিবেন;
- (৯) অস্থায়ীভাবে আমদানিকৃত ইরেকশন ম্যাটেরিয়ালস্, যন্ত্রপাতি ও যন্ত্রাংশ বিদ্যুৎ উৎপাদন কেন্দ্র কর্তৃক বাণিজ্যিকভাবে উৎপাদন শুরু হইবার পূর্বেই আমদানি করিতে হইবে এবং বাণিজ্যিকভাবে উৎপাদন শুরু হইবার ছয় মাসের মধ্যে বিদেশে ফেরত প্রদান করিতে হইবে;
- (১০) অস্থায়ীভাবে আমদানিকৃত ইরেকশন ম্যাটেরিয়ালস্, যন্ত্রপাতি ও যন্ত্রাংশ নির্দিষ্ট সময়সীমার মধ্যে যুক্তিসঙ্গত কারণে বিদেশে ফেরত প্রদান করা সম্ভব না হইলে সংশ্লিষ্ট কমিশনার ছয় মাস মেয়াদ বৃদ্ধি করিতে পারিবেন, উক্ত বর্ধিত মেয়াদের মধ্যেও উক্ত পণ্যসামগ্রী ফেরত প্রদানে সক্ষম না হইলে যুক্তিসঙ্গত কারণ উল্লেখপূর্বক উক্ত সময়সীমা শেষ হইবার ত্রিশ দিন পূর্বে সদস্য (কাস্টমস: নীতি ও আইসিটি), জাতীয় রাজস্ব বোর্ডের নিকট সময় বৃদ্ধির জন্য আবেদন করা যাইবে;
- (১১) দফা (১০) এর অধীন দাখিলকৃত আবেদন পরীক্ষা-নিরীক্ষা করিয়া যথাযথ প্রতীয়মান হইলে সংশ্লিষ্ট কমিশনার বরাবর অস্থায়ীভাবে আমদানিকৃত ইরেকশন ম্যাটেরিয়ালস্ এর উপর প্রযোজ্য শুল্ক-করের বিপরীতে জামানত হিসেবে যে কোনো তফসিলি ব্যাংক হইতে শুল্ক-করের সমপরিমাণ অর্থের নিঃশর্ত ও অব্যাহত ব্যাংক গ্যারান্টি দাখিলের শর্ত সাপেক্ষে সদস্য (কাস্টমস: নীতি ও আইসিটি) প্রয়োজনে সময় বৃদ্ধির আদেশ প্রদান করিতে পারিবেন;

- (১২) অস্থায়ীভাবে আমদানিকৃত ও শুল্কায়িত পণ্য চালানোর তথ্য সংশ্লিষ্ট কাস্টমস স্টেশনে বৎসর ভিত্তিক সংখ্যানুক্রমিকভাবে রেজিস্টারে লিপিবদ্ধ করিতে হইবে;
- (১৩) বিদ্যুৎ উৎপাদনের সহিত সম্পর্কিত নহে, বিদ্যুৎ উৎপাদন কেন্দ্রে ব্যবহার্য নহে এবং বিদ্যুৎ উৎপাদন কেন্দ্র স্থাপনের জন্য প্রয়োজনীয় প্লান্ট ও ইকুইপমেন্ট কিংবা ইরেকশন ম্যাটেরিয়ালস, যন্ত্রপাতি ও যন্ত্রাংশও নহে এইরূপ তফসিলে বর্ণিত বাংলাদেশে সহজলভ্য ও কনজিউম্যাবল পণ্য (available and consumable goods) এই প্রজ্ঞাপনের অধীন রেয়াতি সুবিধায় আমদানিযোগ্য হইবে না; এবং
- (১৪) অস্থায়ীভাবে আমদানিকৃত ইরেকশন ম্যাটেরিয়ালস, যন্ত্রপাতি ও যন্ত্রাংশের উপর প্রযোজ্য শুল্ক-কর পরিশোধ ব্যতিরেকে বিক্রয়, ভাড়া প্রদান বা অন্যবিধভাবে হস্তান্তর করা যাইবে না:

তবে শর্ত থাকে যে, জাতীয় রাজস্ব বোর্ডের অনুমতি সাপেক্ষে প্রযোজ্য শুল্ক-কর পরিশোধপূর্বক বিক্রয় বা হস্তান্তর করা যাইবে।

ব্যাখ্যা।- এই প্রজ্ঞাপনের উদ্দেশ্য পূরণকল্পে-

- (ক) “ইরেকশন ম্যাটেরিয়ালস” অর্থে বিদ্যুৎ উৎপাদনের সহিত সম্পর্কিত ও বিদ্যুৎ উৎপাদন কেন্দ্র স্থাপনের লক্ষ্যে অস্থায়ীভাবে আমদানিকৃত পণ্যসামগ্রী, যন্ত্রপাতি ও যন্ত্রাংশও ইহার অন্তর্ভুক্ত হইবে;
- (খ) “কনজিউম্যাবল পণ্য” অর্থ বিদ্যুৎ উৎপাদন কেন্দ্র স্থাপনের লক্ষ্যে তফসিলে বর্ণিত আমদানিকৃত কোনো পণ্য যাহা প্রত্যক্ষ বা পরোক্ষভাবে ব্যবহারের ফলে আংশিক বা সম্পূর্ণ নিঃশেষ হইয়া যায় অথবা পুনর্ব্যবহারযোগ্যতা হারায়;
- (গ) “প্রত্যয়নকারী কর্তৃপক্ষ” অর্থ-
- (অ) সরকারি মালিকানাধীন বিদ্যুৎ উৎপাদন কেন্দ্রের ক্ষেত্রে চেয়ারম্যান, বিদ্যুৎ উন্নয়ন বোর্ড;
- (আ) সরকারের সাথে চুক্তিবদ্ধ বেসরকারি বিদ্যুৎ উৎপাদন কেন্দ্রের ক্ষেত্রে সদস্য (কোম্পানি অ্যাফেয়ার্স), বিদ্যুৎ উন্নয়ন বোর্ড;
- (ই) পল্লী বিদ্যুতায়ন বোর্ডের নিজস্ব বিদ্যুৎ উৎপাদন কেন্দ্র অথবা চুক্তিবদ্ধ বিদ্যুৎ উৎপাদন কেন্দ্রের ক্ষেত্রে চেয়ারম্যান, পল্লী বিদ্যুতায়ন বোর্ড;

- (ঘ) “প্লান্ট ও ইকুইপমেন্ট” অর্থ বিদ্যুৎ উৎপাদনের সহিত সম্পর্কিত ও বিদ্যুৎ উৎপাদন কেন্দ্রে ব্যবহার্য স্থায়ীভাবে আমদানিকৃত পণ্যসামগ্রী, যন্ত্রপাতি ও যন্ত্রাংশ; এবং
- (ঙ) “সহজলভ্য পণ্য” অর্থ বাংলাদেশের ভৌগোলিক সীমারেখায় অবস্থিত দুই বা ততোধিক প্রতিষ্ঠানে উৎপাদিত হয় কিংবা অন্যভাবে বাংলাদেশে সহজে পাওয়া যায় এইরূপ পণ্য।

২। ০৫ মার্চ, ২০২০ খ্রিষ্টাব্দ তারিখে জারীকৃত প্রজ্ঞাপন এস.আর.ও. নং ৭০-আইন/২০২০/৬০/কাস্টমস এতদ্বারা রহিত করা হইল।

৩। এই প্রজ্ঞাপন ৬ জুন, ২০২৪ খ্রিষ্টাব্দ তারিখে কার্যকর হইবে এবং ৩০ জুন, ২০২৮ খ্রিষ্টাব্দ তারিখ পর্যন্ত বলবৎ থাকিবে।

পরিশিষ্ট-১

[শর্তাংশের দফা (৪) দ্রষ্টব্য]

প্রত্যয়নপত্র

প্রত্যয়ন করা যাইতেছে যে, (প্রতিষ্ঠানের নাম, ঠিকানা)..... সরকারি/বেসরকারি খাতে বিদ্যুৎ উৎপাদন কেন্দ্র স্থাপনের লক্ষ্যে বাংলাদেশ সরকারের সহিত চুক্তিবদ্ধ একটি প্রতিষ্ঠান। প্রত্যয়নাধীন প্লান্ট ও ইকুইপমেন্ট বিদ্যুৎ উৎপাদনের সহিত সম্পর্কিত এবং সম্পাদিত চুক্তি মোতাবেক কেবল বিদ্যুৎ উৎপাদনের নিমিত্ত বিদ্যুৎ কেন্দ্র স্থাপনের জন্য প্রস্তুতকৃত প্রজেক্ট প্লানে অন্তর্ভুক্ত রহিয়াছে এবং উক্ত প্রকল্পের কাজে ব্যবহারের নিমিত্ত প্রজ্ঞাপনের শর্ত প্রতিপালনপূর্বক আমদানিকৃত। উক্ত প্রতিষ্ঠান কর্তৃক ইনভয়েস নং..... তারিখ,..... বিল অব লেডিং/এয়ারওয়ে বিল/ট্রাক রিসিপ্ট নং..... তারিখ,.....এ উল্লিখিত বিবরণ, পরিমাণ ও মূল্য অনুযায়ী আমদানিকৃত প্লান্ট ও ইকুইপমেন্ট উক্ত কেন্দ্রে ব্যবহৃত হইবে।

স্বাক্ষর :.....

নাম :.....

তারিখ:

পদবি :.....

সীল :.....

পরিশিষ্ট-২

[শর্তাংশের দফা (৫) দ্রষ্টব্য]

অঞ্জীকারনামা

আমি/আমরা এই মর্মে অঞ্জীকার ও প্রত্যয়ন করিতেছি যে, ইনভয়েস নং.....
তারিখ,.....বিল অব লেডিং/এয়ারওয়ে বিল/ট্রাক রিসিপ্ট নং.....
তারিখ,..... এর মাধ্যমে আমদানিকৃত প্লান্ট ও ইকুইপমেন্ট বিদ্যুৎ উৎপাদনের সহিত
সম্পর্কিত এবং উহা নির্মিতব্য বিদ্যুৎ উৎপাদন কেন্দ্রে স্থাপিত বা বিদ্যুৎ উৎপাদন কেন্দ্র পরিচালনায়
ব্যবহৃত হইবে। আমি/আমরা আরো অঞ্জীকার করিতেছি যে, আমদানিকৃত প্লান্ট ও ইকুইপমেন্ট
বিদ্যুৎ উৎপাদনের নিমিত্ত স্থাপিতব্য আমার/আমাদের বিদ্যুৎ উৎপাদন কেন্দ্র ব্যতীত অন্য কোনো
উদ্দেশ্যে/স্থানে ব্যবহৃত/স্থাপিত হইলে কিংবা বিদেশে ফেরত/প্রেরণ (প্রযোজ্য ক্ষেত্রে) করা না হইলে
আমি/আমরা আমদানিকালে উহার উপর প্রযোজ্য সকল শুল্ক ও কর পরিশোধ করিতে বাধ্য থাকিব
এবং উহার জন্য কাস্টমস আইন, ২০২৩ (২০২৩ সনের ৫৭ নং আইন) এর অধীন আইনানুগ ব্যবস্থা
গ্রহণ করা হইলে আমি/আমরা তা মানিয়া লইতে বাধ্য থাকিব।

প্রতিষ্ঠানের নাম :

ঠিকানা :

..... ।

পরিশিষ্ট-৩

[শর্তাংশের দফা (৬) দ্রষ্টব্য]

গণপ্রজাতন্ত্রী বাংলাদেশ সরকার

বরাবর

সদস্য (কাস্টমস: নীতি ও আইসিটি)

জাতীয় রাজস্ব বোর্ড, ঢাকা।

বিষয়: আমদানিকৃত প্লান্ট ও ইকুইপমেন্ট রেন্নাতি সুবিধায় শুল্কায়নের আবেদন।

- ১। আবেদনকারী প্রতিষ্ঠানের নাম :
- ২। প্রতিষ্ঠানের ঠিকানা : (ক) অফিস :-----

(খ) বিদ্যুৎ কেন্দ্র/প্রকল্প :-----

- ৩। মূসক নিবন্ধন নম্বর (প্রযোজ্য ক্ষেত্রে) :
- ৪। করদাতা সনাক্তকরণ নম্বর (TIN) (প্রযোজ্য ক্ষেত্রে) :
- ৫। বিনিয়োগ বোর্ডের নিবন্ধন নম্বর (প্রযোজ্য ক্ষেত্রে) :
- ৬। আমদানি নিবন্ধন নম্বর (প্রযোজ্য ক্ষেত্রে) :
- ৭। আমদানিকৃত প্লান্ট ও ইকুইপমেন্ট এর বিবরণ :
(প্রয়োজনে পৃথক কাগজ সংযুক্ত করুন)

ক্রমিক নং	পণ্যের বিবরণ	এইচ.এস. কোড (H.S Code)	পরিমাণ (কেজি/ইউনিট)	মূল্য (টাকা)	উৎস দেশ
(১)	(২)	(৩)	(৪)	(৫)	(৬)

- ৮। বার্ষিক মোট বিদ্যুৎ উৎপাদন ক্ষমতা :
- ৯। মোট বিনিয়োগের পরিমাণ :
- ১০। যে কাস্টমস স্টেশনের মাধ্যমে মেশিনারি আমদানি হইবে :

(বি: দ্র: আবেদনপত্রের সহিত ইনভয়েস, প্রোফরমা ইনভয়েস, ঋণপত্র, নকশা, লে-আউট প্ল্যান, প্রকল্পপত্র (যদি থাকে), টার্নকি চুক্তিপত্রসহ সংশ্লিষ্ট অন্যান্য দলিলাদি দাখিল করিতে হইবে)

তারিখ:-----

(প্রত্যয়নকারী কর্তৃপক্ষ)
স্বাক্ষর ও সিল।

তফসিল

[শর্তাংশের দফা (১৩) দৃষ্টব্য]

(সহজলভ্য ও কনজিউম্যাবল পণ্যের তালিকা)

- ১। স্টিল শিট (steel sheet): American Standard Testing Method (ASTM) অনুযায়ী ছয় মিলিমিটার বা তৎনিম্ন A36 বা সমমানের MS প্লেট;
- ২। স্টিল রড;
- ৩। স্টিল পাইপ (dia ১.৫ ইঞ্চির নিম্নে);
- ৪। সকল ধরনের সিমেন্ট;
- ৫। বোল্ডার স্টোন (boulder stone);
- ৬। সকল প্রকার টাইলস;
- ৭। প্রি-ফের্রিকটেড বিল্ডিং;
- ৮। সকল প্রকার PHC/SPC/PC Pile এবং SPC Pole
- ৯। বৈদ্যুতিক লাইট-ফিটিংস;
- ১০। ট্রান্সমিশন টাওয়ার;
- ১১। ক্যাবল (Control Cable, Communication Cable and Optical Fiber Cable এবং 132 কেভি ও তদূর্ধ্ব পাওয়ার ক্যাবল ব্যতীত);
- ১২। সকল ধরনের বিতরণ ট্রান্সফরমার (distribution transformer);
- ১৩। সকল ধরনের রং (paint) ও বার্নিশ;
- ১৪। গৃহস্থালি সামগ্রী (household goods);
- ১৫। সকল ধরনের রাসায়নিক সামগ্রী (chemicals);
- ১৬। লুব্রিকেটিং অয়েল;
- ১৭। ট্রান্সফরমার অয়েল;
- ১৮। সকল ধরনের অফিস সরঞ্জামাদি ও আসবাবপত্র;
- ১৯। অনূর্ধ্ব ২,০০,০০০ বিটিইউ (BTU) সম্পন্ন air conditioner;
- ২০। ড্রেজার;
- ২১। অ্যাংকর বোট (anchor boat); এবং
- ২২। কাস্টমস আইন, ২০২৩ (২০২৩ সনের ৫৭ নং আইন) এর প্রথম তফসিল এ বর্ণিত Heading 87.02 হইতে Heading 87.03 এর অন্তর্ভুক্ত সকল ধরনের যানবাহন।

রাষ্ট্রপতির আদেশক্রমে,

স্বাক্ষরিত/-

আবু হেনা মোঃ রহমাতুল মুনিম
সিনিয়র সচিব।